



Arkivnr: 2017/1202-4

Saksbehandlar: Berit Nyland

Saksframlegg

Saksgang

Utval	Saknr.	Møtedato
Utval for opplæring og helse		14.03.2017

Politisk Skuleval 2017

Samandrag

Dei politiske skulevala vert i år avvikla 4. og 5. september. Fylkesrådmannen vil leggje opp til ei ramme på skulane med både skuledebatt og valborg innanfor ein avgrensa tidsperiode. Administrasjonen planlegg gjennomføringa i samarbeid med dei politiske ungdomspartia og skulane.

Administrasjonen har ved tidlegare skuleval gitt tilråding om urneval i tråd med Utdanningsdirektoratet si tilråding, men erfaringar viser at ressursbruken knytt til trykking, pakking og utsending av røystesettar til skulane er omfattande. I lys av dei gode tilbakemeldingane frå skular som har prøvd ordninga med e-val, meiner fylkesrådmannen at det er fleire omsyn som talar for at ein i Hordaland tilrår elektroniske val på skulane. Skular som ønskjer å halde fram med urneval, skal framleis kunne gjennomføre dette som vanleg.

Forslag til vedtak

1. Utval for opplæring- og helse sluttar seg til fylkesrådmannen sitt framlegg for gjennomføring av politiske debattar og valborg ved dei vidaregåande skulane hausten 2017.
2. Utval for opplæring- og helse sluttar seg til fylkesrådmannen sitt framlegg om å tilrå e-val framfor urneval ved skulevala 2017.

Rune Haugsdal
fylkesrådmann

Svein Heggheim
fylkesdirektør opplæring

Saksframlegget er godkjent elektronisk og har derfor inga underskrift.

Fylkesrådmannen, 21.02.2017

Innleiing:

Dei politiske skulevala vert i år avvikla 4. og 5. september. Valdatoane er tett opp til skulestart så det vert noko avgrensa tid til skulevalkamp. Fylkesrådmannen rår til at skulevalkampen tar til den 23.08. Det er opp til rektor å avgjere om det skal vere valkamp på skulen sitt område. Det er Utdanningsdirektoratet (UDIR) som har overordna ansvar for skulevala og som sender invitasjon om deltaking til skulane. Norsk Senter for Forskningsdata (NSD) er nasjonal arrangør og fagleg ansvarleg for gjennomføring og analysar. Fylkeskommunen koordinerer kontakt mellom skulane og dei politiske ungdomspartia for å sikre best mogleg logistikk rundt skuledebattar og valborg. Skulane organiserer skulevalet lokalt. Dei melder seg på og legg til rette for valdebatt og valborg på skulen.

Plan for tilrettelegging av skuledebatt og valborg hausten 2017

Fylkesrådmannen ser det som viktig at elevane vert engasjerte i politikk og finn det positivt at dei politiske ungdomspartia får høve til å markere seg på skulen sitt område under valkampen. Fylkesrådmannen vil leggje til rette for både debattar og valborg i forkant av skulevalet 2017. Ein legg opp til tett dialog med ungdomspartia og skulane. Administrasjonen vil leggje til rette for størst mogleg samlokalisering av debattar og valborg. Det vert planlagt regionvis organisering av debatt og valborg med fastsett dato og tid.

Valform: Urneval vs. Elektronisk val

UDIR rår skulane til å nytte urneval ved skulevala, men gjer og merksam på at det er mogleg å gjennomføre elektronisk val i kontrollerte omgjevnader. Ved skulevalet i 2015 blei det gjennomført elektronisk val ved 12 skular i Hordaland. Desse skulane har alt frå 2 til 16 års erfaringar med elektronisk valform. Det vart gjennomført ei evaluering av valforma ved desse skulane i 2015. Alle opplevde den elektroniske ordninga som meir praktisk og mindre ressurskrevjande enn urneval. Skulane peikar særleg på miljøsinn og den digitale utviklinga i samfunnet elles som årsaker til at dei har valt elektroniske val.

Til dei skulane som gjennomførte urneval, vart det pakka og sendt ut om lag 40000 røystesettlar. Til kvart skuleval sender administrasjonen ut mellom 40000 og 60000 røystesettlar. Skulane har som regel vanskar med å finne fram til nøyaktig behov for røystesettlar og bestiller derfor noko i overkant av reelt forbruk. Dette gjer at eit større tal med røystesettlar vert kasta.

NSD vart invitert til eit møte med administrasjonen for å drøfte erfaringane med dei ulike valformene. NSD viser til UDIR si tilråding om urneval som det styrande prinsipp for valordninga ved skulevala, men understrekar at det er opp til den einskilde fylkeskommune om dei vil følgje tilrådinga. Administrasjonen har følgd UDIR si tilråding om urneval ved tidlegare skuleval, men erfarer at det går mykje tid og ressursar til å trykke, pakke og sende ut røystesettlar til skulane, i tillegg til at ein stor del av desse vert kasta. I lys av dei gode tilbakemeldingane frå skular som har prøvd ordninga med e-val, meiner fylkesrådmannen at det er fleire omsyn som talar for at ein i Hordaland bør tilrå elektroniske val på skulane. Skular som ønskjer å halde fram med urneval, skal fortsatt kunne gjennomføre dette som vanleg.